

5 DYMA WYLIAU HYFRYD LLAWEN

(HERE IS A SPLENDID JOYFUL FESTIVAL)

1. Dym-a Wyl-iau hyf-ryd llaw-en Y caf-wyd les- u Grist yn fachgen; Yng
 nghôr yr ych ym Meth-lem Jiw-da Y gan-wyd Ef o groth Mar-ei-a. Ag-
 or-wyd yn-o'r drug- ar- edd-fa Oedd wed- i ei chau er cod-wm Add-a;
 Gan Fab Duw'r oedd ag - or - iad- au | ag - or drys- au yr holl drys-or- au.

2. Fe gafwyd yno berlau hyfryd
 I oleu'r ffordd i Dir y Bywyd,
 A chafwyd olew, heb ddim mesur,
 I'w roi ym mriwiau pob pechadur,
 Yno caed y pur awelon
 I wneud yn fyw'r holl esgyrn sychion
 Oedd yn y dyffryn gynt cyn lawned
 A thir yr Eifftied o locustied.

3. Yno cafwyd meddyginiaeth
 I rai cloffion rodio'n berffaith,
 Y dall i weled a'r mud lefaru,
 A gwahangleifion wedi hynny,
 Ni bu erioed un doctor ffisig
 Ar y ddaear, nac un meddyg,
 Yn gyffelyb i'r Meseia,
 Sef y doctor mawr enedia.

4. Fe gynigiodd Iesu tirion
 Ei iachawdwriaeth i'r Iddewon;
 Am ei gariad fe gadd gerydd,
 Bu yntau iddynt yn faen tramgwydd,
 Dioddefodd goron ddrain a'i wawdio,
 Ei fflangellu a'i gernodio;
 Yn y diwedd cadd, mewn dicter,
 Ei groeshoelio rhwng dau leider.

5. Pan oedd Iesu Grist yn dioddau,
 Haul y Nefoedd fawr dywyllai;
 Y ddaear lawr, fe grynodd hithau
 Pan oedd Iesu Grist mewn poenau.
 Y trydydd dydd ar ôl ei gladdu,
 Er gwaethaf angau, codai i fyny,
 Ac aeth at ei wir ddisgyblion
 I ddangos iddynt ôl yr hoelion.

6. Ymhen y deugain dydd, mewn llwyddiant,
 Yr aeth i Nefoedd y Gogoniant,
 I eiriol dros yr etifeddion
 Sydd ar y ddaear mewn peryglon,
 A phan ddelo eto i farnu
 Rhaid i bawb ar sydd yn pydru
 Yn y môr a'r tir ymburio
 I roddi cyfri o'r hyn aeth heibio.

7. Rhown fawl, "Hosanna! Haleliwia!",
 O glod i'r Oen fu ar Galfaria,
 Am iddo roi ei waed yn ffrydia
 Er mwyn i ni gael llwyr ddihangfa.
 Gogoniant fyth i enw'r Iesu
 Am ein cadw a'n diogelu;
 Dwg ni, O Dduw, i'th Nefoedd lawen,
 Amen, Amen, ni oll ddymunem.

T8p AWC 306. Recordwyd (chwe phennill yn unig) 25.10.60 gan Robert Thomas Evans (Ifermwr, g. 1880). Perthwelin, Dinas Mawddwy, sir Feirionnydd. Dysgodd RTE y garol ar yr aelwyd. Fel "Hen Garol Perthwelin" y'i hadwaenid gynt yn lleol, oherwydd ei chanu'n gyson gan y teulu ar hyd cyfarfodydd plygeniau yn y fro. "Y Ceiliog Du" oedd yr enw a roid ar y dôn.